

Scheibenschlagen

2006

Nachname Vorname

Löschgruppe Graf-Gurnau

Grafer Kapelle

Liabe Leit, heint mecht mar enk olla schia begrießa,
wos d'rnoch iatz kimmt, sell kuan verdrießa.
Noch oltem Brauch tia mar ou Böller schiaßa.
A Verübl, dös war ins gor it recht,
a Hetz muaß sei, wega dem tia mar's decht.
D'Fuirwehr tuat enk in dr Noat olli halfa,
drum seits it beas und lot'sas galta.

Die earscht Scheiba, die hella,
keart dr Grafer Kapella.
Daß dr hl. Johannes von Nepamuk weiterhin über ins wocht,
und in dr letschta Stund für olla a Fürsproch mocht.

Vor Sturm und Hochwosser ins verschont,
damit jeder geara in Grof und Gurnau do wohnt.

Da Böller hobts keart, iatz gia mar's on,
zearscht keima huirra d'Gurnauer dron.

Thöni Maria

Dia Scheiba tia mar weit außa schiaßa
und damit die Thöni Maria begrießa.
Für 2006 wünscht dir d'Fuirwehr a guate Zeit
viel Glück, Gsundheit und Zufriedenheit.

Fam Juen Klaus Anna

Die Holzlegga im Kohlplatz des kann jeder sogä
Da hats kua längere gebe bis aua auf d'Soga.
Togaus, togin hot dr Klaus Holz zur Sanna ocha gschlichtet,
und Brennmaterial für a poor kolta Winter grichtet.
Dass Holz gut schwimmt, a jeder woäß
die Brigl sei gonga auf a Roas.
Nu dr Klaus, miar tia nit liaga,
losst si so leicht nit unterkriaga;
Wenn ihm d'Sanna schua olls nimmt,
holt er glei wieder auða, wos s'Wosser bringt.
Gonza Beim schwemmt s'Hochwosser on,
dr Klaus fischt auða, wos er nu kann.
Iatz kann er wieder mocha a feins Fuir,
weil s'Öl isch des Johr eh so tuir.
Klaus, loss di wega dem Holz nit verdriaða,
miar tia dr no an Böller schiaða.

FA Maschler Karl

Di negscht Scheiba kinnt ins aus,
für'n Maschler Karl und sei Autohaus.
Damit er Auto verkoufa und flicka kann,
stellt er Mechaniker und ou Lehrbuaba on,
so an Orbeitsplotz für di junga Leit,
isch viel weart grad in der heitiga Zeit.
Miar wünschä dir wieder viel Orbeit im nägschta Johr,
und an heida Umsatz, des isch eh klor.

Siegele Angelika

Angelika, oans muaß die Fuirwehr iatz schua amal fraga,
sein die Grafer und Gurnauer Buba wirklich so zum plaga?
Du bisch sicherlich öfters am Ries,
lei in Gurnau tuat ma die nie antreffa, sall isch gwies.
A Scheiba hola m'r iatz aus d'r Gluat,
dass s'negscht Jahr ou wieder verläuft ganz guat.

Siegele Gerd

Was sella m'r über'n Gerd groaß schreiba,
da bisch als Sprichla-Schreiber nit zu beneida.
Secha tuat ma die überhaupt numma, es isch a Gfret,
hasch du d'r Huam überhaupt no dei Bett?
A schiane Scheibe tian m'r d'r decht no schwinga,
damit m'r von dir neagscht's Jahr wieder kenna an Haufa singa.

Fam Siegele Waldemar

Dr Winter wor kolt, dr Wind pfeift um d'Ohra,
do isch im Waldemar glott s'Wosser o'gfroara.
Dia Mander vom Thurner kema gschwind,
damit des Wosser in dr Leitung wieder rinnt.
Weil so an Hausholt ohne Wosser steaht,
wenn in dr Kucha, im Bod und im Klo nuit mia geaht.
An gonza Vormittog sei dia Orbeiter dron,
damit d'Ruth z'Mittog wieder a Sippli kocha kann.

Fam Juen Josef Paula

Miar tia am Seppl vergalsgott sogä,
dass mar derfa dia Scheiba über sei Wiesa ocha schloga!
Huirä war ihm bold dr Pilla in dr Neadr umgfloga,
drum hot er glei a poor Ziagl unta icha gschouba.
Iatz dita mar no a Raketa in Himmel auajoga,
und viel Glick für's negscht Johr sogä!

Fam Juen Hubert Erika

Dia Raketa iatz bsunders weit außä marschieret
iatzweart im Hubert und dr Erika zum Poppali gratuliert.
Guat hob's eis zwoa des gmocht,
wos ma so unverhofft olls z'weg bringet über Nocht!
So an Nachziegler bringet icha an nuia Schwung
und haltet enk so richtig jung.
Viel Freid sell enk di Sophia mocha
drum loss mar enk no an Böller krocha.

Fam Schmid Helmut Linde

Sein Traktor hot d'r Helli auf den neuesten Stond brocht
und hot hinta an Hydrauliklift drongmocht.
So braucht er's Holz numma so weit schupfa
iatz kann er 3-Meterlegga mocha und die Briegl gonz aui lupfa.
Wenns funktioniert, isch dös Werkli sicher schia
nocha braucht d'r Helli kua Fußstiahali mia.
Dös Kreuz mit seim Kreuz tuat in holt ou schua long ploga
da wissata miar d'rfür gonz guati Unterloga.
Grod für solchi Leida von ama Monn
gabs z'Londegg daussa an Massagesalon.
Ua Behondlung tata mir dir spendiera
wenn dia Massage hilft, dein Kreuzweah auszkuriera.

Fam Schmid Harald Angelika

Dar Harald isch an viel beschäftigter Mann,
nach Schiklub und Fuierwehr isch iatz dar Pianner Fußballclub dran.
Als Trainer isch er da seit im letschten Frühjahr bei der Arbeit,
da organisiert er viel und opfert viel Zeit.
Seit seim Start isch Pians nimmar ganz hinta,
in a paar Jahr weart ma sie in der T-Mobile Bundesliga ganz vorna finda.
Lei beim Training isch dar Harald viel zu genau,
er spielt oft selber mit und geht richtig hart auf'n Ball drau.
Lei manchmal isch'es Einsatz zu viel,
da geht schnell amol a Kapsel hin.
Harald, im Alter set ma sich schona und numma aso ploga,
drum hau mar dar iatz a Scheiba acha.

Fam Grießer Hubert Rosmarie

Beim Motorradfohra hinta hocka und beim Hubert fescht heba,
weart dr Rosi z'fad, si mecht liaber salber Gas geba.
'Des kann i bold, des war decht glocht',
und schua weara du earschta Fohrstunda gmocht;
si stellt si on gor nit so dumm,
bis ihr auf'n Fuaß follt des schwarze Drumm.
Und stott mit'm Motorrod trainiara,
Geht si mit da Krucka spaziera.
Iatz schiaßt di Fuirwehr no an Böller in'd Nocht,
d' Rosi gibt nit so schnell auf und hot im Herbst decht no da A-Schein gmocht.

Grießer Elisabeth

Dia Scheiba geiht außa, d'Funka fliaga au,
d'Elisabeth hob mar huira s'earscht Mol auf dr Lischta drau.
Noch dr Schual a Orbeit finda hot si fescht gfuxt,
dia gonza Bewerbungsschreiba hoba nuit gnutzt.
Iatz hot si a guats Platzli bei dr. Firma Gitterle gfunda,
und draht auf Urga icha oll Tog ihr Runda.
Sinsch isch si ou schua toll vergeba,
und tuat mit'm Philipp fescht Hantla heba.

Grießer Eva Maria

D Eva isch zur Zeit in Deutschland daußa,
und muaß det ou unter dr Wocha hausa.
Si tuat an Ausbildung zur Musiktherapeutin genießa,
und miar hoffa, dass tuasch nit z'fescht verdrießa.
Miar tia dar iatz no an Böller spendiera,
dass tuasch die Schual guat absolviera!

Fam Scheiber Helmut Martha

Vom Helmut sein gonzer Stolz
Isch d'r Kreislauf mit seim Holz.
Mit einer Soalwinda vom Tobl auatransportiert
Dia Briegl in Radla gnschitta und deponiert.
S'negscht Logar wor 100 Meter weiter,
döt hot er d' Radla g'hackt in kluanari Scheit'r.
Nocha weards s'Holz wieder verloda und weiterg'führt
und auf seiner Legga im Wold deponiert.
Earsch von dort weards noch Richtung Heimat brocht
Und in d'r Garasch wieder a Leggo g'mocht.
So muaß S'Holz von d'r Familie Scheiber an Haufa Stationa durchloufa
bis es endlich kimmt in Ofa.

Scheiber Robert

D'r heurige Winter hat in Robert inspiriert,
weil'r fast jeden Tag auf die Schipista spaziert.
Lei so über die Pista achi fahra isch im Robert nit gnuag,
weil es fahra ja schua viele andere im Pfluag.
An Rennanzug, jedes Jahr a nuis Paarli Schi
und an Haufa Wachs tuat d'r Robert sei Eigen nenna,
weil er will deacht gwinna s'uine oder andere Renna.
Robert, du wearsch decht nit so viel trainiera,
dass neagscht's Jahr kannsch in Kitzbühel vom Siegertreppchen achiflaniera.

Scheiber Peter

Dr Peter isch huira s'erscht mal dabei,
und zum drzähla gibt's allerlei!
Bei Peters Moped isch nuit mia Original und nuit registriert,
des hoba die Schandi ou gsecha und standibe die Nummer abmontiert!
An inserem Fuirwehrtisch
hockt dr Peter seit er 15 isch.
Dr Peter isch gwora an richtiga Fuirwehrmann,
den man nit lei zum Aufrauma hoba kann.
Alla sei mar froh in Peter darbei zum hoba,
iatz tia mar no a Scheiba weit außi joga!

Rainalter Ekehardt

Im Eki miaßa vorab gratuliera,
weil in letschter Zeit tuat er erfolgreich seine CD's präsentiera!
In der Rechtschreibung tuat er si manchmal hart und was it alli bescheid,
vielleicht schau's amol nach in am Langenscheid!
"Der Tod des Trompeters, mit hartem "T" tuat in Eki nit long interessiera
des isch ja wurscht, wenn er isch eh schua toat, brauchsch it long umadiskutiera.
Mir hoffa die Musi tuat weiter guat loufa
damit kannsch weiter deine CD's vekoufa !

Fam Rainalter Eckehardt Hella

Beim Eki wissa miar er hat in seiner Bude alli an morz Stress,
drum macht er in seim nuia Kallar kuan Sport,
sondern mit dr Hella an wohlverdienta Wellness-ort!
Und nou darzu haba sie sich a Solarheizung kouft,
damit ihr Schwimmbodheizung günstiger louft.
D'Hella hat alls gmanaget und nuit versaumt,
damit dr Eki den Energy-Gloab abraumt!
So weard Hella mit'm Eki bald amol übern Bildschirm marschiera
und des gonze Projekt präsentiera.
Des gonze isch a tolle Werbeaktion,
vielleicht hobts ou eppas für ins übrig als Provision!
Miar hoffa miar hoba iatz it z'viel verrata
und tian iatz no a Scheiba außibrata!

Fam Huber Robert Gabi

D'r Hans Robert und d'Gabi tian orbatat und in Urlaub gian
vom uana a bissli weniger und vom ondera a bissli mia.
Wer rastet - der rostet konn ma do nicht sogä
weil im Betrieb tian sie sie olli nou a bissli ploga.
Und dass ihna dös olles no long viel Spaß ou mocht
iatz für enk a spezieller Böller krocht.

Huber Susanne

Umbaut hot sie dahuam, hoba miar gheart
nu die Temperatur hot sie a bissli gsteart.
An schianer Ofa tuat iatz in d'r Stuba stiahn
drfür muaß iatz d'r Peter Holz introga giahn.
Iatz weare dia zwoa nou mia im Wold umchalofa
und Holz zomtian für den nuia Ofa.
Und dass dear ou richtig ziacht und brennt
iatz für enk nou a Raketa in Nochthimmel rennt.

Fam Schütz Egon Sissi

Dr Egon vergisst ollpott eppas, des isch holt so,
iatz wissa mir nu it, isch es s' Alter oder dr Stress im Büro!
Loss di nit vom Alzheimer dartappa,
sinsch fohrsch 3mal vu Landeck retour,
wega am Handy, an Schlissl und ara Kappa!
Miar wissa ja, dass die der TUI tuat tuiflisch umchastressa,
drum weara mar dir die Orbeit als Furrwehrkassier oh it vergessa !
Bitte liabe Sissi, tua di um dein Mann iatz mehr kimmera,
sinsch konsch sich die Log no mehr verschlimmera!

Schütz Florian

Ou die schianschte Zeit geht amol vorbei,
iatz ischas nocha aus mit dera Studierarei.
Dar Florian schreibt grad brav an seiner Diplomarbeit,
da hot mar für andere Socha numma aso viel Zeit.
Drum weart sich sei Freindin denkt hoba i fahr nach Rotterdam,
und erscht wenn der mit seiner Arbeit fertig isch kimm i wieder ham.
Viel Glück in dein letschta Studiensemester und schließ guat ab,
drum schiaß mar dar iatz a Scheiba übern Bichl ab.

Fam Larcher Peter Margret

Mit'm Motorrod draht d'r Peter seini Runda
Und tuat dabei ou Frankreich erkunda.
Mit ara Ducati hot d'r Peter gmocht a Duell
Auf uanmol war der Guate ob'r z'schnell.
Auf a Ortstafel hot er sein Motorrod auchitrieba
vielleicht, dass er's besser lese kann -
weil dia Tofla sein in Frankreich nicht deitsch on'schrieba.
An doppelte Überschlog hot sein Motorradli gmocht -
weil mit ama uanfocha war d'r Peter nit zfrieda, sall war decht glocht.
'Sel a vie' hot er si denkt, dös kann passiera
dahuam weara miar den Rohma schon wieder justiera.

Larcher Mathias

Am Mathias isch huira sei KTM explodiert,
und zwor wors an Kolbareiber, an dem isch's krepieret.
Iatz will er sein Volvo verkoufa,
dramit sei Motorradli wieder kann auf Toura loufa.
Miar hoffa dei Auto kouft glei amol uanar,
weil an bessara Wecker in dr Friaht hot kuaner !

Marianne -Gerhard Kopp (Gäste BRD)

Iatz tia mar amol alla insere Gäst aus Deutschland begrießa,
una a wunderschiane Scheiba außa schießa!
Es isch schwar bei enk eppas zu darfroga,
"deas gibt's ja it" i glob insere Informanta tian ins lei ploga.
Und weil nocha fascht it möglich isch zum reima
tia mar liaber nou a Scheiba aussu treiba!

Vogt Herta

Di Herta sieht ma bei ins nu hie und amol,
weil oft isch si ihr Enkali kinza im Stubaitol.
Dahuam isch sie selten, aber nocha isch sie froah
weil sie hat a Ruah vor dem Kindergschroah.
Es isch ja nit so, als tat sie des it mega,
so a kluans Madali isch decht an richtiga Segga.
Dr Herta und dem Nachwuchs moch mar iatz nou a morz Freid.
indem a schiane Scheiba außi jeiht.

Fam Schultes Hubert Brigitte

Dr Hubert und die Brigitte,
haba's iatz ohne Problelme zamma gschofft, bis weit über die Lebensmittel!
Miar hoffa eas behaltet's deas weiterhin so bei,
und miar drfrogga bald amol a hetziges Allerlei.
Aber miar tia enk iatz it long aufholta und enk ploga
darfür tia mar iatz a Scheiba bis in Bach ocha joga.

Fam Marth Edmund Helene

Bam Edi und bar Helene tat ins interessiera
tiaz eas iatz schuan auf Neni und Nala trainiarea.
Dös Enkali werd enk nocha viel Freid bringa,
nocha sieht ma da Edi sicher mit Popawoga umchaspringa.
Guatä Besserung weiterhin mechta miar auf olle Fäll soga
und tian nou dazua a Raketa auchajoga.

Fam Landerer Franz Elfriede

D'Élfriede sieht ma im Summar öfter ums Haus umma gia,
do tuat sie in Gorta olli richta recht schia.
Für dia Bliamla tuat sie viel Zeit aufbringa,
und dass sie schia blia lass mar no a Böller singa.
Des muasch ja nit olli alluan tian,
die Enkala tian des Handwerk sicher ou schua verstian.
Iatz lass mar enk no a Scheiba weit aussa,
dass mit deine Enkala konsch no an haufa Runda um' n Garta sausa.

Würthenberger Claudia u. Armin

Die Fam. Würthenberger hot verlassa ket s' huamelige Nest,
denn sie sei a Johr long in England g' west.
Die Claudia hot heura nit so viel zum locha,
denn sie tuat s' Grichtspraktikum fertig mocha.
D' r Armin und die Paula tian d' r weil olli in Bus ia sitza,
damit sie kenna in See die Pista oa flitza.
Iatz leg mar enk no a Scheiba in Gluat,
damit sich beim Schifohra niamand verletza tuat.

Öttl Wolfgang Sieß Christine

Dr Wolfgang und d Christa hoba mit ihrem Haus a mords Freid,
iatz hoba si ou sauber umadum Plotta gleit.
Hinterm' m Haus an Rosa ausgsaht,
und bold drauf ou s' earscht Mol gmaht.
Des Mauerli vor' m Haus mit ama Blechla sauber fixiert,
ober bold drauf wor des ou schua demoliert.
Mit' m Auto isch uaner zuacha krocht,
ma muaß si schua froga, wo der hot da Fiahnerschei gmocht.
So muaß ma ou bei am nuia Haus glei wieder onfonga flicka,
losst' s enk nit verdriaßa, miar tia enk a Raketa in Himmel aua schicka.

Fam Pfeifer Karl Brigitte

Drweil dr Karl sei Mineralöl verfiahrt,
und deis Johr an heida Preis drfür kassiert,
geahnt di Brigitte a Runde mit ihrem kluana Hund,
weil des isch darzua nou richtig gsund.
Heart ma am Spielplotz an Krawall, braucht's nit drschrecka,
weil des isch vom Junior sei Ralleystrecka.
Mit seir Krossmaschin gibt er onständig Zunder,
Charly, dass du no nit mitmoch'sch geit ins Wunder.
Letscht's Johr wor er in Norwega zum Hochseefischa,
und hot kenna seina Kollega an 17 kg Seelachs autischa.
Nu bei dem brutala Sturm hoba si bold z'viel riskiert,
und dr Charly hot des Boot grad und grad zum Ufer manövriert.
Drei Tog wor ihm schlecht, do hot er kuan Fisch mia braucht,
so hot ihn dia Partie auf dem Meer daußa gschlaucht.
A Raketa tia mar no weit außa treiba
tua liaber auf'm See oder nächnar am Ufer bleiba.

Pekar Manfred und Sabine

Für'n Manfred und D´ Sabine lossa mar glei an Böller krocha,
weil sie tian erstmols von d´r Sprichlalista locha.
Dia Scheiba tia mar ou no weit aussa schiassa,
miar hoffa es tiats s´ wohna in Gurnau geniassa.
S´ Huamatli hobat´s enk schua grichtat schia,
deis wear mar ins beim kassiera no onschau tia.

Carpentari Jürgen und Sonja

Beim Jürgen hat sich a groaße Veränderung ergeba,
an nuier Job isch einkehrt in sei Leba.
Ma findat ihn iatz numma beim Corda Geiger daußa,
iatz sigt man mit seim nuia Firmawoga durch die Gegend brausa.
Beim Ulmer tuat er iatz Socha verkoufa,
iatz muaß'r numma in am Geschäft umma loufa.
Miar winscha dar in deem nuia Beruf viel Glück und immer guate Fahrt,
miar hoffa, dass ma dean Böller ou bei enk duba keart hot.

Fam Carpentari Reinhard Michaela

In Reinhard hot ma heura gseicha bei d' r Fahrschual aus und in gia,
do hoba sich manche Leit denkt, was weart d' r denn da olli tia.
In A-Schein und die Fahrlehrerprüfung hot' r da absolviert,
d' r für hot' r viel Freizeit investiert.
D' r Aufwond fürn A-Schein hot sich schnell rentiert,
denn d' r Onkel Peter hot' m glei sei olte' s Motorradli spendiert.
Wenn mar ins Haus zu dir kema kassiera,
tia mar d' r no zu deine Prüfunga gratuliera.

Fam Carpentari Sandrino Rosmarie

D' r Sandrino und die Rosi hoba heura die Terasse renoviert,
und dabei viel Zeit und Geld investiert.
Iatz kenna sie wieder öfter in d' r Sunna daussa liega,
oder die Schwiegereltern beim Kartna besiega.
Aber Sandrino deis Johr isch no long,
da kimmt vielleicht ou no die Kucha dron.
Damit heura wieder mia Lust und Laune hosch zum baura,
tian mar d' r dia Scheiba gonz weit aussa haua.

Fam Carpentari Reinhard Marlies

Heura beim Hochwasser in d' r Nacht,
hot d' r Reinhard numma glocht.
In gonza Summar hoba sie Holz zsama grichtat,
aber die Sanna hot nocha alles vernichtat.
Des Holz isch drvon g' schwumma,
und am Reinhard wara am liabsta die Zachar oa grunna.
Damit sich d' r Reinhard und d' Marlies nit z' viel draus macha tia,
lass a m' r dia Scheiba gonz weit aussa gia.

Wilhelm Karin

Karin sieht ma im Summar öfter ums Haus umma gia,
do tuat sie in Vorplatz und in Wintergorta richta recht schia.
Dass sie a neus Auto hot miassa koufa,
isch sicher gweisa weil s' olte isch numma so guat gloufa.
Wünscha tian mar dir mit dem Auto viele schiane Stunda,
und dass tuasch draia an haufa unfallfreie Runda.

Pfisterer Dieter Köhler Christine

Miar wünsch im Dieter u. dr Christine a glückliches Jahr
und hoffa, dass alls guat geat, so wias im letschta war!
Gsundheit und Zfriedaheit und a guate Zeit,
isch's wichtigste auf des ma a helle Scheiba weit ausi treibt!

Pfisterer Peter

Übern Peter gibt's nit viel z'berichta,
außer dass er muaß sei Auto olli richta.
Iatz will er sein Audi verkoufa,
weil deis Auto isch ja zum darvon loufa.
A nuis Auto hat er ou schua gfunda, an Suzuki Vitara
hoff mar, dass der hot nit so viel Schada.
Iatz loss mar no an Böller krocha,
dass mit deina Auto in Zukunft hosch mia zum Loch!

Fam Haag Sabine u. Peter

Dr Peter ich mit dr Bauerei im und um's Haus ferti sowe,
iatz hat er decht für a Hobbybaurschoft a bissli Zeit.
Miar wissa it, ob er aus der Bretterwond an Stoll mocha mecht,
weil gnuag Plotz für a poor Goaß hat er decht.
Iatz miaßats nocha an Stopper an enker Gortagatter montiera,
weil der Wind tuat di Sabine ob und zua beim Außafohra segiera.
Miar tia enk iatz ou numma long ploga,
und liaber a wunderschiana Scheiba ins Tol ocha joga.

Fam Schütz Erwin Christine

S'leatscht Jahr haba sich d'r Erwin und Christine missa Rollerblades koufa,
und nacha glei ins Verwall eini loufa
In Erwin hat's ab'r saggrisch verrissa,
und nacha voll auf'n Boda gschmissa.
Glück im Unglück kann ma bei so am Unfall lei saga,
drum tian mir no a Raketa in Himmel auchi jaga.

Schütz Manuel

In Manu hoba miar bis iatz nou it bei insrar Fuirwehr begrießa kenna,
aber mir lossa'm iatz decht amol a Raketa in Himml aua brenna.
In Manu's Leba gibt's momenta kune Absaga sondern lei Siege,
iatz hot ers gschofft in die Absamer Bullenschmiede!
Miar hoffa dr Manu tuat nocha ou amol a Auge zua drucka,
falls unar von ins tuat amol z'schnell zur Fuirwehr ausrucka.
Es isch in dera Schul sicher nit leicht,
deswega hoffa mir dass er alles was er will det ou erreicht!

Fam Walter Markus Sybille

D' r Markus hot um sei Tochter in schlafala a neue Möglichkeit gfunda,
er draht mit seim Auto a paar Gurnau-runda.
Für dia Methode braucht ma sich nit scheniera,
solang des tuat richtig guat funktioniera.
Iatz leg mar enk no a Scheiba in Gluat,
damit s' Kind olli schnell inschlofa tuat.
Loasnet's zu - und lassets wachsa enk die Haar, es dauert numa long,
nocha macht enk Sybille anam jede a fesche Haarpracht im nuia Salon!

Walter Berta

Die Berta isch für ihr Alter ou nou anständig unterwegs,
und wenn ma sie trifft hot ma allerweil a Hetz!
Ma trifft sie mal da amol det,
ander in ihrem Alter sei da öfter amol krank im Bett.
Mir winscha dar viel Gsundheit und bleib a so
a Raketa iatz aua singt sowieso.

Senn Anna

Di Anna mit ihra 82 Johr,
isch olli no guat drauf, des isch gwiß wohr.
Wega ihrem Herz wor si letschts Johr im Kronkahaas,
ober des bringt di Anna ou nit draus.
So an Service vo Zeit zu Zeit muaß hold sein,
dia Doktor stella den Rhythmus wieder richtig ein.
Iatz klopft des Herz wieder, wia sich's keart,
und d'Anna merkt, dass s'Schnaufa wieder besser weart.
Drum fohrt si noch Abano auf Kur mit a poor Fraua,
recht hosch, tua lei fescht auf di schaua.
Die Scheiba loss mar weit auða singa,
Anna, des Johr sell dir Gsundheit und Glück nu bringa.

Fam Senn Werner Brigitte

Dr Werner steigt auf der Karriereleiter,
wieder amol a Sprosse weiter;
Als Chef bei der Flugpolizei in Wien,
an tolla Poschta, und dr Zohltog gwieß ou recht schian;
Nu uans, Werner, kenn mar nit verstian:
Iatz hosch dahuam drei fesche Weiberleit
Und losch si allua di gonze Zeit;
Oder isch dir dia geballte Frauenpower,
z'viel gwoara auf di Dauer?
Werner, bleib in Wien dunta recht brav,
nocha beschert dir die Brigitte a 'weekend in love'.
Di Brigitte hot a Reise noch Andalusien gwunna,
miar wünschta ihr viel Spaß in Spanien in dr Sunna.

Senn Evi

D'Evi hat leatscht's Jahr an Arzt kontaktiert,
weil ihr isch eppas bleids passiert.
So a Verletzung am Knie kann schmerzhaft sein,
da findet ma sich glei im Krankenhaus ein.
A Raketa lassa m'r iatz no auchi jaga,
damit di s'neagscht Weihnachten nit wieder muasch im Krankenhaus abplaga.

Fam Senn Arnold Ursula

Vom Arnold kann ma nit d'r froga,
drum miassa miar huira d'Ursula ploga.
Dös Tageslicht bam Auto braucht ma nu zum fohra
Wenn, du stiahn bleibsch konnsch es ausscholta, noch tatsch Dir Strom d'r spora.
Wenn's noch numma geiht, waoß d'r Arnold genau
d' Batterie isch leer - mein guati Frau.
Und dia drei kluana Della in uaner Wocha, wo kema denn dia hea?
- sicher nit vom Pulverschnea.
Dös sett enk ober nit verdrieaßa
weil im März gibt's an runda Geburtstog zu begießa.
Deane Glückwünsch schließa miar ins iatz schua on
Und zinta nou a tolli Raketa on.

Fam Winkler Franz

Mit deara Scheiba , dia miar iatz aussitreiba
tian mar bam Winklers Franz stiahnbleiba.
Bar Labara kritisiere waera miar huira nit tian,
weil zu deam wor sein letscht's Johr nit bsunders schian.
A Raketa zinta miar iatz nou on,
s'ngescht Johr kimmsch noch wieder richtig dron.

Fam Haslinger Hans Gertrud

Da Hons und d'Gertraud tian miar vermissa,
Weil dia zwoa hoba z'Gurnau s'Hondtuach gschmissa.
Uans lossa miar ins ob'r nit v'rwehra,
dass miar dia zwoa weiterhin hoba in Ehra.
A Raketa lossa miar iatz nou singa,
dia sett enk Glück und G'sundheit bringa.

Fam Plattner Wolfgang Angelika

Dr Wolfgang präsentiert si im Fernseh'n gonz cool,
am Gardassee locker im Liegestuhl.
Oder wor des gor in der Hängematte,
gonz leger und ohne Krawatte.
Er drzählt vom Reiz vo seim Feriendomizil,
vom Urlaub am Campingplotz mit Stil.
Bei am Glasla Wein und am italienischa Essa,
konn ma da Alltagsfruscht schnell vergessa.
Zrugg kimmt er voller Schwung und Elan,
den weart er ou braucha in Grins doba beim Gemeindeclan.

Tiroler Imbiss

O'Raketa tia miar iatz schiaß
und isern Imbisskoch begrieß.
D'r Alisan mocht Kebap und Pizza dazua
do kehrt d'Fuerwehr oh gera zua.

Fam Traxl Richard Frieda

Da Richard sieht ma schua wieder ums Haus umchabolza
vielleicht fongt er gor schua on zum Holza.
Sinsch gehrt er holt viel spaziera und dabei ou olli d'Soga inspiziere.
Bis zum Kappala kann d' Frieda schua ou mitgiahn
weil do doba tata zum Roschta a Poor Bankla stiahn .

Kobler Maria

Dia Scheiba tian m'r weit außi schießa,
und damit Maria begrießa.
Mir hoffa du bisch neagscht's wieder so fleißig aus'm Haus,
nacha geahrt sich sicherlich d'r uane oder andere Plauderer aus.

Kobler Jasmin

Die neagscht Scheiba geht außi weit und schian,
und mir bleiba bei d'r Jasmin stiahn.
Du bisch selta amal d'rhuam zum finda,
wie sella mir da eppas schreiba über deine Sündä.
An Böller lassa m'r iatz no explodiera,
dass m'r die neagscht's Johr wieder amal secha durch Graf marschiera.

Kobler Gerald

D'r Gerald hat s'leatsch Jahr keat a Feier,
weil iatz muss'r numma zahla die Junggesellensteuer.
Mir hoffa du tuasch um des Junggesellenleben nit z'viel verdrießa,
und dein nuia Lebensabschnitt saggrisch genießa.
D'Fuirwehr tuat d'r iatz ou no fleisig gratuliera,
und drum lassa m'r a Raketa in Himmel auchi marschiera.

Öztürk Cerat

Zur Staatsbürgerschaft tia miar dir gratuliera
Und lossa a Scheiba weit außa marschiera.
Zur Fuirwehrrhalle hasch as ja nit weit
Ins freit , dass zum Halfa warsch bereit.
Mir nehma die da beim Wort
Denn beim Arbeita isch glei bei ins am richtigä Ort.

Schlatter Harald

Liabe Leit mir mechta enk sogä
d'Melli und da Harald tia mar itaz plogä.
Dia zwoa hoba wia konz ondersch sei
z'Weihnachten oh a Springerei.
D'Melli holt an Chritbom mit oaner morz Freht
der isch aso groß, dass sien bold it datreht.
D'r Harald schaugt so guats holt geat
dass er grad in der Stuba steat.
Für dia Orbeit kenama di nit loba
am Stefanitog leit er zomt da Kugla am Boda.
Do sogä sie glei, des weart nuit nutza
do miasama in Bom auf der Terassa aufputza.
Sie hoffä das do nuit mehr passiert
und der Christbom übert Nocht inen Schnee icha g'friert.
S'negscht Johr miasats holt nocha schauga
und in Christbom oan stabilera Fuß dron baua.

Fam Schlatter Engelbert Stefanie

Iatz isch d'r Engl numma lei z'zoms ongaschiert,
na sogor die Londwirtschaft in Kronburg hoba ,s ihm nou auchadividiert.
Iatz weard sie d'r Engl am Schluß Kronburg an Hochsitz baua,
damit er ollas von dört konn überschaua.
Drum weard er iatz nou besser darüber wocha
dass seine Knechtla kuani Blödsinn mocha.
Dös hot d' Stefanie ober nit d'r gremmt,
ober decht hot sich ihra an Nerv inklemmt.
In der Wärmekabine weard dös sicher wieder guat,
drum hola miar ou nou a Raketa aus d'd Gluat.

Nöbl Hannes

Seit letschtem Herbst tuat d'r Hannes wieder in Reutte am Poly sitza,
lei woll'tr numma jeden Tag mit seim Auto über'n Fernpass schwitza.
In Wängle hat'r sich nieder g'lassa,
und sich g'sucht a schine Gassa.
Da hat'r sich denkt, lei die ganze Wocha in Reutte wohna deas kanns ou nit sein,
da zich i fürs Wochenende deacht glei no in Landeck bei am Freind ein.
Wenn ma die ganz Wocha tuat die Kinder instruiera,
sucht d'r Hannes am Wochenende an Ausgleich beim musiziera.
THEVOXPOPULI hoßt sei neue Band,
und damit es habt's viel Erfolg, a Raketa in Himmel auchi rennt.

Nöbl Thomas

D´r Thomas tuat sei Freizeit gera am Playstation verbringa,
aber wenn sie spiela FIFA 2006 tian ihm meistens zwianig Tore gelinga.
Kürzlich hoba sie a Turnier beim Hannes am Bildschirm austroga,
aber dabei hot d´r Tommy im Halbfinale voll versoga.
D´r dritte Platz isch ihm dabei lei gelunga,
darfür hot´r wia ma keart hot beim Bier trinka weitaus gwunna.
Iatz loss mar dir no a Scheiba weit aussa singa,
dass beim negshta Halbfinale gegen Hannes tuasch gwinna.

Nöbl Anna

Iatz lossa miar an Böll'r krocha
und tian Station bar Nöbl Anna mocha.
Dös Fernsehprogramm im Februar dös wor a Procht
weil Olympia muuß ma schau, sall war decht g'locht.
Ob Eislauf, Rodla oder Schispringa,
d' Anna wor vom Fernseher nit weck z'bringa.
Gsundheit winscha miar vor aollem mit deara Scheiba
drum setts si ou weit außatreiba.

Nöbl Ferdinand

Schlepperfohra kann d'r Ferdl im Gelände guat
und d'r bei ou olli viel aufloda tuat.
aufloda kann er Holzbriegl grad gnua
nu tuat er nocha d'Bordwond nit recht zua.
In deam Foll wars jo grad zum locha,
dass sie dia Holzbriegl nit selbständig mocha.
Der Nachbar hot miassa in Deckung giahn,
ob'r zum Glück bleiba sie grad voar d' Haustür stiahn.
A Raketa zinta miar nou on,
weil so eppa kann passiera am bescht Monn.

Kirschner Katharina

Dia Scheiba tian m'r weit außi treiba,
und b'r Kathi stian bleiba.
Hoffentlich tuasch n'eagschts Jahr wieder viele Sacha treiba,
drum tian m'r no an Böller anreiba.

Moschen Anni

Dia Scheiba tian mar iatz weit aua treiba,
gesund sett d'Anni nou long bleiba.
Ma sigt sie oft beim spaziera giahn,
miar geaba dar an Tipp, Nordic Walking isch in und bsunders schian.
Bleib ins sou wia da bisch,
sou munter jung und frisch.

Wagner Walter Ingrid

S 'Grianbachli isch fr'd Kinder normalerweis a Paradies
da kansch Staudamm baua deis isch gwie.
Lei huiru isch's Wasser bergloufa
und ou die groa Bagger haba fascht nuit mia gholfa.
Ja des 'Wasser hat holt an eigene Gewalt
aber iatz kenna Kinder wieder spiela wisana gfollt.
Und dass der Grianbach bleibt in seim Bett
iatz no a Scheiba weit aua geat vom Brett!

Fam Ruetz Markus

Was sella mar bern Markus nuis schreiba,
jeder kennt ihn und woa was'r s'ganz Jahr tuat treiba.
Tatkrftig arbeitet er in der Pfarre Brugga daa.
6 mol im Jahr bringt'r in Pfarrbrief aua.
In deam Brief stiahn viele interessante Socha,
ma kann lei empfehla, tiats amol an Blick icha mocha.
Dir und deiner Familie wnscha mar als Guat,
und hola fr enk a Scheiba aus der Gluat.

Huber Karin

D'Karin siegt ma viel in Graf umma giahn,
alli mit a paar Kinder am Weg, da hasch schua eppas ztian.
S'Auto vur Karin isch schua Stadt bekannt,
deas isch a Unikat, sou eppas gibt ma numma aus dar Hand.
Wenn die Auto um a Kurve rennt,
kannscht dar sicher sein, dass die jeder glei kennt.
Viel Glck im negshta Johr und dass'as die Auto nou long tuat,
schmeia mar iatz a Scheiba aus dar Gluat.

Fam Thurner Udo, Evelin

Im Herbscht, deas hoba alle gseacha,
isch an mortz Auflauf bei Udo's Firma gweasa.
An Haufa Fuierwehrler sein umma grennt,
vor lauter Blaulicht hasch di bald nimmer auskennt.
Udo, miar mechta bei dir dank schian sogä,
vielleicht kenna mar ja wieder amol weaga ara Abschnittsprob frogä.
Mit am Knall zinta mar iatz an Böller an,
und henga a Raketa glei hinta dran.

Koch Helga

Helga, wos sella mar bei dir schreiba,
wia mar heart tuasch du ja s'holb Johr in Wien verweila.
Miar wissa nit ob stells eppas an,
sinscht kam deas glei beim Sprichli schreiba dran.
Lass di im negschta Johr a bissli öfter blicka,
für die tian mar iatz a Scheiba ocha schicka.

Pammer Herbert Kathrein Anni

Beim Herbert und bei dar Anni lasst sich huira nit viel schreiba,
um enk eppas schlimms zum darzeala miaßta mar maßlos übertreiba.
Dar Herbert isch ingspannt in sei Geschäftstätigkeit,
wenn ma wou hin will hat ma nit weit.
An Anruf bei Herberts Taxi-Unternehma reicht und epparn kimmt vorbei,
da isch ma am Ziel recht sicher und glei.
Fürs Johr 2006 winscha mar enk s'aller bescht,
enkar Schreiba treiba mar außa recht fescht.

FA Wucherer Heinz

Iatz bleiba miar bar Baufirma Wucherer stiahn
weil do hots ou an Haufa Orbat geba, kann jeder v'rstiahn.
In deam Loger isch a Ordnung, dös isch grad a Procht
nu d,Sanna hot dös imAugust durcheinonerbrocht
Kniatief hot ma kenne imWosser stiahn
dear Onblick wor sicher numma schian.
Glei drauf wor olles wieder wia frisch
drum lossa miar nou an Raketa und an Böller vom Tisch.

FA Wille Harald

Vom Hochwosser hot der Harry gnua
und ziacht zum Wohna d'r Sunna zua.
Z' Grins in Tasseir hot er sich a Haus onglocht
und dört doba eppas schians draus gmocht.
Vor Sunna kann er nia gnua kriegga
drum sieht man ofter in Gran Canaria liega.
An Böll'r geheart zu deara Scheiba d'rzua
noch lossa miar da Harry wieder in Ruah.

FA Wille Egon

Miar bleiba iatz bar Firma Getränke Wille stiahn
und lossa dia Scheiba aussu, gonz schian.
Dös Hoachwosser wor für dia Firma a großer Schreck,
im Lager hot der Boch g'orbeitet und die holba Fassla wora weck.
Viel z'ruggkeama sein sicher numma,
weil dia sein sicher bis Wian ochagschwumma.
Mit viel Elan wurde noch a glei dia Halle und ollas ondere repariert
dazua weard von ins mit ara Raketa für dean Fleiß gratuliert.

Horvarth Martha

Gsund und agil des isch ja klar
Martha tuat it jammera fürwahr.
D'Familie unter uam Dach wer kann des schua hoba
- und kema iatz Urenkel so
sell sich decht ,d' Oma mit dena Fratza ploga .
Mir wünsch a dr weiterhin viel Gsundheit
Und joga iatz aua a Raketa gonz weit.

Horvarth Thomas

Thomas miar kenna intz langsam numma aus,
wo geasch iatz wirkla bei dr Tür in und aus.
Im Winter in Kappl bei da Bergbahn Gald kassiera
wearsch eppa noch a ausrasta und a bissli tachiniera.
Flexibel des set ma ja in der heutiga Zeit sei
Du bisch'es, recht so , wenn's di dabei ou dunkt fei.

Fam Horvarth Erich Elisabeth

Wer tat des glouba ?

Der Erich und sei Frau hocka im Fitnesscenter aufm Radla douba.

Mir glouba iatz will er's wissa, und tuat sich richtig ploga

und denkt sich dabei: „dem Gerätla wear i iatz die Grenza aufzoaga.

A Raketa miar iatz no hoch aua schicka

denn dein Adoniskörper mechta mar schu im rechta Licht erblicka.

Horvarth Heidemarie

Wenn miar auf der Baustella in d'Händ spucka

Tuat Heidi im Fotolabor in Perjen die Bilder ins rechte Licht rucka.

Tua mit ins amol a Fotoshooting mocha

Mir tata schu in d' Kamera locha.

Horvarth Iris

Gera tata mar wissa , wo du die tuasch umchatreiba

Mir tian dr jedenfalls an Böller anreiba.

Miar secha die zwar nia wenn zur Arbeit tuasch gia

Aber s' Auto tuat öfters in Ried beim Schlecker stia.

Und settasch als Freundin no zum hoaba sei

brauchsch lei kema in d'Fuirwehhalle, des tunkt insara Buba sicher fein.

Fam Nitsche Kurdoglu Gerald Brigitte

Brigitte tia mar selta beim Reima hoba

denn meischtens kimmt dr Gerald drann zum ploga.

Brigitte wie haltesch du des eppa alli aus

mit ama Künstler in uam Haus?

Dr. Gerald isch ja nit lei bekannt für sei Molerei

so isch er ja als Literat in Frankfurt olli mit dabei.

Dia Biacher, oh mei, in dem Dialekt

so manch unar tat si ja lesa und schaua was drinna steckt.

Magsch nit so a paar Texte in d'Gemeindezeitung tia

Nocha hattasch ja sofort a paar Auflage mia , des war decht schia.

Fam Schmid Robert Monika

Robert und monika haba bei der Mura nit viel Schada beim Grund und Haus davon troga,
die Lastwoga seibe enk in und aus gfohra drum mecht mir no dankschia sogä.
Des Wasser kombiniert mit Schotter und Gestein,
kann was ganz schlimmes sein.
Miar winscha enk a ruhiges neues Jahr,
iatz no a Raketa auchä fliagt wunderbar.

Regensburger Michael Deiser Isabell

A schiane Raketa lossa miar iatz marschiera,
und tian damit d' r Isabell und im Michael zum Biabla gratuliera.
D Ísabell muaß in Bua Tag und Nacht stillä und wicklä,
dafür tuat sie in Michael am Wochenende olli spaziera schicka.
Damit enk d' r Nachwuchs no long auf Trab halta tuat,
hol mar iatz no a Scheiba aus d' r Gluat.

Maidel Johann

Im Johann hat's huira toll darwischt,
wia ma heart hat'r im August im Keller Forella gfischt.
Beim Hochwasser isch als unter Wasser gstandä,
zum Glück worä a paar guate Helfer vorhandä.
Die negscht Scheiba iatz für'n Johann ausä streicht,
miar hoffä die Haus isch iatz numma feicht.

Maidel Wilfried

Ou in Willi hat's Wosser nit verschont,
und isch in sei Garage grunna prompt.
Als war nass und voller Dreck,
sicher hosch miasa schmeisa viel weck.
Insar Tipp, in Zukunft tua als auf a Hebebühne auchä,
nocha kann sich s'Wasser ruhig in die Garage ischa traua.
Deas kann deine Auto nit mia anhoba,
und iatz haua mar dir nou a Scheiba oa.

Spiss Mathias Schmid Marianne

Mathias und marianne sieht ma viel mit da Kinder spaziera,
aber sinsch tat ins mia über enk interessiera.
Miar kenna nit viel dr Zähla,
nix isch bekannt nit a mal a paar schmela.
Iatz wera miar no a Scheiba ocha schloga,
vielleicht wissa miar nächst Jahr mia zum Soga.

Matt Christian

D'r Christian isch an flotter Mann
dear isch olli am neuesten Zuiag dran.
Beim Auto braucht ma viel PS unter d'r Hauba,
nach kann ma beeindrucka die fescha Tauba.
An Audi TT muaß ma sich da schua anschaffa,
damit die Nachbara haba eppas zum gaffa.
An Böller lassa m'r iatz no kracha,
damit mit deim Auto hasch no viel zum lacha.

Fam Matt Richard Rosi

Richard und Rosi beim haus ständig richa und saniera,
da bleibt kua zeit zum spaziera.
Nur am abend werd des Laufband aktiviert,
und fest an der Kondition trainiert.
Des nächste Projekt heißt Balkon neu gestalten,
iatz geah't s los acha mit dem Alten.
Der garta isch o wunderschan anglegt,
mit Holzsteeg und Biotop wo si der Richard o a mal aufs Bankli legt.
Miar wünsch a viel fred beim Hausgestalta,
daß enk dia raketa hilft beim Ideen entfalta

Spiß Roland

D' r Roland hat an tolla Woga-glänza von der Polliersoafa,
da kimsch bald nit mit dem Finger zwischa Radkasta und Roafa.
Die Brugga zum Haus isch iatz o viel breiter und stabiler,
da isch ma viel schneller beim losfahra und mobieler.
Beim nächste Woga tat für ins an roata guat paßa,
nocha kansch ins für an Kommandowoga a mal umalassa.

Matt Andreas

D´r Andreas hat da bezirk Landeck wirkli satt,
und isch lieber in der Imster-Oberstadt.
Da hat er sich a schiani Wohnung gerichtet,
iatz werd er in Graf numma oft gsichtet.
Mir hoffa du wersch ins wohl nit für alli verlassa,
drum fliegt iatz no a Scheiba bis her auf Stroßa.

Fam Matt Egon Annemarie

D´r Egon hat huira an runda Geburtstag,
da wünsch a mir Alles Gute isch ja kua frog.
70 Jahr werd er schua, ma sieht es ihm gar nit an,
er isch no alli fit wia an 20 jähriger Mann.
A nuis Auto hat er sich und seiner Annemarie koaft,
er aber decht jeden Tag zu fuaß mit da Hund am Abrichteplatz umaloaft.
Miar wünsch dir iatz no alles Beste zu deim Jubeljahr,
iatz no a Raketa aucha fliegt wunderbar.

Petter Johann

D'r Joschi isch sportlich wie eh und je,
und d'rzu isch'r ou gera auf Gaude.
Viele verschiedene Sportarta tusch du trainiera,
und bei Wettkämpfe alli in die vordera Plätz plaziera.
Hoffentlich tuasch in Zukunft no viele gute Platzierungen macha,
drum lassa m'r iatz no an Böller kracha.

Matt Caroline

Caroline isch öfter no in Graf zum secha,
aber des wert si numma so lang sei-nocha isch es gschecha,
Des haus im pitztal isch globi schua im entstehn,
da werd sie numma so oft in Graf mit Popawaga umagehn.
Miar hoffa du wersch um Graf nit zuviel verdrießa,
drum wera miar dir no a Raketa schiaßa.

Heimhilcher Franz Friedrich + Elisabeth

Dar Friedrich isch huira nit s'erscht mol auf dar Lischta,
aber damit ma eppas interessants schreiba kannt miaßt man amol bei am Blödsinn
darwische.

Sou ischas aber leider nit und miar miaßa sogä,
hoffentlich tian mar auf s'negschta Johr mia darfroga.
Alles Gute im negschta har und lass di amol blicka,
für deas tian mar dar iatz a Scheiba ocha schicka.

FA Jais Werkstätte

Bei sou viel Schnea, Leit passats au,
das keara guate Roufa aufs Auto drau.
Bei dar Firma Jais kann ma selche koufa,
und muaß nit weit in a anders Gschäft loufa.
Miar winscha enk daß's Gschäft weiter guat louft,
und jeder seine Roufa bei enk daußa kouft.

FA Streng

S gonz Johr sein von d'r Firma Streng Auto auf'm Ries
gloda hoba sie vom Storkaboch Tol Schotter und Kies.
Z'viel Wosser im a Kieswerk isch holt ou nit guat
wenn's nocha d'Loschtauto und d'Bagger vermura tuat.
Braucht hat ma dia Geräte noch in jedem Eck
nu wora sie leider olla unterm Dreck.
An Böller lossa miar iatz ou nou krocha
weil miar wissa genau, da Firma Streng baut dös Kieswerk wieder recht au.

FA Benatt

Bei d'r Firma Benatt, wia nit olle wissa,
dort weare die tollschten Pläne gschmissa.
Deas Büro isch in Fochkreisen guat bekonnt
plant weard do für Projekte im gonza Lond.
Sette miar amol an Rot braucha fürs Baua,
weare miar ba enk noch vorbeischaua.
An Böll'r lossa miar iatz nou krocha
mochts weiterhin nou viel guati Socha.

Geschäft Aglamaz

Endlich kann ma in Graf inkoufa,
wenn ma eppas zum essa braucht kann ma glei zum Aglamaz loufa.
Viel frisches Gmias und andere Socha,
deas bringt an guata „Hausmann“ richtig zum locha.
Miar winscha enk viel Erfolg und an Haufa Kundschaft,
für deas iatz nou an Böller krocht.

Asia Cafe

Wie jeds Jahr kenna mar lei guats schreiba,
wenn in deas Cafe icha geasch, mechtasch glei länger bleiba.
Viele Leit und a netts Personal,
s'Essa isch guat, deas isch optimal.
Ou deas Jahr winscha mar enk a guats Gschäft und an Haufa Leit,
dia Scheiba sel ausafliga ganz weit.

Schröcker Evelin

Evelin isch in Landeck auf der Bank,
sinsch wissa mir nix und sei komplett blank.
Des Internetbanking hat sie unter sich,
an jeden Häcker kennt sie und jeden schlich.
Hoffentlich wera miar über di, nächst Jahr mia berichta,
nocha kenna miar a bißli mia dichta.

Fam Schröcker Hermann Elfriede

D' r Hermann hat nach der Katastrophe sich beim Aufrauma im Nachbarsfeld
fest engaschiert,
und da Boda schian plantiert.
Doch kaum war die Arbeit sauber g' macht,
hat ma wieder a nuis Problem über Nacht.
A Zwieschendeponie wella si am Hermann vor d'Haustür herknalla,
da riaft der Hermann: des lass mir nit gfalla.
Für 3 Jahr die Aussicht versaut,
a jeden Tag an Bagger im Sandhaufa umadum haut.
Da isch im der Zintl- Infoabend grad recht kema,
da hat er glei gseat des wera mir nit so einfach hinnehma.
Nach dem Hochwasser hat er mit dr Frieda im Herbst no an Fliegär bucht,
und isch nach Amerika - und hat det s' Madli bsucht!

Schröcker Franziska

Franziska hat Amerika über a Jahr angeschaut,
und hat iatz wieder im schiana Graf ihr Lager aufbaut.
Im Winter isch sie iatz als Schilehrerin angestellt,
am Abend isch schua lang dunkel bis sie die Schi in Kaller icha stellt.
Miar hoffa du wersch nit so schnell Graf verlassa,
drum lassa miar no a Scheiba bis her auf Stroßa.

Hotz Martin

Beim Martin und beim Stefan brennt alli a Liacht in dar Werkstatt,
deas isch a Zoacha dass ma an Haufa Arbeit hat.
Da bleibt im Martin nit viel Zeit für ondere Socha,
höchstens amal a Unternehmung mit dar Freindin mocha.
Bei dar Fuierwehr isch ar alli nou fescht aktiv und dabei,
dass deas sou bleibt setzta mar iatz an Böller frei.

Fam Hotz Raimund Monika

D´r Raimund und Monika sei fest im Olympia-fieber glega,
die Österreicher wara ja im richtiga Medailienrega.
Jeden Tag haba si im Fernseh g´spannt die verschiedenen Bewerbe angeschaut,
und bedauert wenn´ s wieder a mal an Läufer ins Netz icha haut.
Miar winscha enk viel Glück im nuia Jahr,
drum fliegt iatz no a Raketa wunderbar.

Wörz Mario

Miar mehta da Mario in Graf huira zuerst mal begrießa,
er kimt vo Niedergallmig, hoffentli tuat er nit huam verdrießa.
D´r Mario tuat beruflich die Hausdacher mit Blech verkleida,
drum muaß er s´ ganze Jahr s´ Wetter derleida.
Im Summer isch er braun wie ein Araber,
andere zohla an haufa im Sonnenstudio des isch o makaber.
Miar winscha dir und deiner freundin schiani Stunda in Graf,
und bleib alli brav.

Blondeel Brigitte

D´r Willi und Brigitt haba miar die letzta Jahr nit auf der Lista ket,
und drum miaßa miar iatz mia Berichta so a gfred.

Brigitte duat in Pettneu beim Campingplatz die Urlauber berata,
da isch an Haufa zum tian da braucht ma nit Rata.

D´r Willi hat sich als Hausmuaster selbständig gmacht,
der bringt jedes Haus auf Fordermann schnell über Nacht.

Iatz wera dena zwoa no a Raketa schießa,
und hoffa miar kenna enk huir a mal bei inserem Festla begrißa.

Hotz Lydia und Beate

Beate hat ihre Wohnung im Dachboda schua bezogen,
wie viel des Arbeit war isch schua betroga.

Im Winter haba dia zwoa viel arbeit mit da Gäst im Ferienhaus,
da giahn die Urlauber ein und aus.

Nu mit dem Heiza isch es numma leicht,
weil die menge vom letzte Jahr bei weitem nit reicht.

Miar wera enk iatz no a Raketa aucha jaga,
und fürs nächste Jahr alles Guate sogä.

Hotz Hannes

D´r Hannes wollt an Bus lieber wie sein Caravan,
weil im Bus schlaft ma wiea daham.

Die letzte scheibe isch aus Blech,
da sieht kuaner icha -so a Pech.

Die hintera Sitz kan ma o ausbaua,
da hat viel platz da kansch grad no so schaua.

Vorna hockt wie in am Cockpit von am Airbus,
und von der Barba gibts hin und da für den Capitän an Kuß.

A Böller wera mir dir iatz no schiaßa,
nocha wersch um dei oltes Auto numa verdrießa.

Fam Hotz Oskar Edith

Dr Oskar hat si a Solaranlag aufs Dach aucha gmacht,
damit er jeden Ölscheich auslacht.

Die Anlag isch für jede Sonneneinstrahlung optimal auslegt,
da er sich über jeden Sonnenstrahl gfred.

Des Werk isch so auslegt da kann ma mit dem warma Wasser in Heizung fohra
und somit an haufa Öl spora.

Daß die Sunna zuwenig scheint, kannt ma mit dem verbinda,
daß ums Haus alli mia Bäum im Heizraum verschwinda.

Die Zwetschgabäum haba o schua miaßa dran globa,
und sei durch Kamin außa gstoaba.

Sollte die Anlag decht a mal zuviel Energie bringa vom Dach,
nach schenk ins o no a paar KW des war a Sach.